

CÓDIGO ÉTICO

Este Código Ético recolle prácticas e comportamentos para as persoas que exerzan a representación da Plataforma Cidadá Ourense Mellor

Democratización da representación política e compromiso ético e político das persoas representantes

As e os representantes actuarán segundo os principios de **igualdade, horizontalidade e transversalidade**, fomentando o funcionamento colexiado, o traballo colaborativo, a escoita activa e o debate de ideas. Promoverán a arbitrase e o consenso na toma de decisións nos diferentes espazos de representación e participación.

Fraternidade entendida como democracia horizontal o que na organización política ven significar asemblearismo.

Cooperación como valor antitético da competición. Afirmamos que sen cooperación nin sequera pode haber democracia. Non hai esquerda que poida sobrevivir coa competición no seu seo

Democracia participativa. Sen participación non é posíbel a democracia. Sen participación a democracia representativa esclerotízase e deriva en oligarquía, os partidos convértense en «aparatos» e as cámaras de representantes en parodias. Propugnamos reconstruír pontes entre a cidadanía e a instancia política, cos seus piares no tecido asociativo horizontal e diverso da cidadanía.

Primicia dos dereitos colectivos. Porque a alternativa á asunción deste valor non é outra que o individualismo a negación mesma da organización social

Laicidade. As crenzas relixiosas e a súa lexítima práctica deben estar totalmente separadas do aparato do Estado a todos os niveis. Só así se garantirá a independencia deste e a igualdade real de crenzas entre os cidadáns e cidadás.

Garantía do principio de obediencia da representación con habilitación de mecanismos de cesamento e revogación

A obediencia na representación garantirase mediante a creación, desenvolvemento e aplicación de mecanismos de participación e de **rendición de contas**. A nivel de organización política as e os representantes someteranse ante o suxeito político e ante a cidadanía que os elixiu.

As representantes implicaranse en promover a **igualdade** no exercicio das súas funcións, combatendo calquera forma de racismo, xenofobia ou discriminación por razón de xénero ou orientación sexual, así como en favorecer a participación política das mulleres e das persoas con diversidade cultural, funcional e afectivo sexual.

Consonte ao compromiso coa **feminización da política**, promoverase que nas candidaturas figuren máis mulleres ca homes. Canto menos, garantiranse listas paritarias en cremalleira.

Os cargos electos, así coma o persoal de confianza e os altos cargos comprometeranse a promover **o uso sustentábel dos recursos naturais e o aforro enerxético** no exercicio das súas funcións.

Compromiso co **coñecemento libre**: cultura, o software, a tecnoloxía e os estándares abertos, máis a liberación de datos públicos. Ademais das medidas que se establezan no programa, os cargos electos e personal de confianza comprometeranse ao fomento das ferramentas que garanten o coñecemento libre no exercicio das súas funcións.

Prohibición das portas xiratorias

As persoas representantes comprométese a non prestar servizos para empresas creadas ou reguladas en virtude do seu cargo durante un prazo de cinco anos dende o seu cesamento. Non poderán acceder aos seus consellos de administración nos dez anos posteriores ao mandato.

Garantía de transparencia das nosas representantes

Os cargos electos, así coma o persoal eventual e os cargos de designación política, farán públicas as súas declaracións de bens, renda e, no seu caso, de patrimonio, desde a toma de posesión e cunha periodicidade anual. Este compromiso estenderase durante 3 anos despois do abandono, calquera que fose a causa, das súas responsabilidades

Financiamento, transparencia e xestión de gastos

Promoverase a **transparencia en materia de financiamento e xestión de gastos**, tanto a nivel de representación institucional como de organización política. A xestión dos recursos e control de gastos rexerese polos principios de **eficiencia, transparencia e sustentabilidade**. O financiamento farase a través dos recursos públicos, para garantir a independencia política e con recursos privados, a través de achegas da cidadanía.

Non profesionalización da política

Para evitar a profesionalización da política, establecerase unha **limitación de permanencia nos cargos públicos** a dúas legislaturas. En todo caso renunciarase a privilexios, agasallos e tratos de favor.

As persoas electas, así coma o persoal de confianza e os altos cargos, non disporán nin terán disposto, en ningún caso, de contas bancarias ou intereses económicos en paraísos fiscais, circunstancia que será motivo de renuncia ao cargo.

Deben renunciar de forma inmediata de todos os cargos as persoas contra as que se dite auto de apertura de xuízo oral, no caso de feitos delituosos relacionados coa corrupción, prevaricación, tráfico de influencias, enriquecemento inxusto con recursos públicos ou privados, suborno, malversación e apropiación de fondos públicos.

En análogas circunstancias renunciarán, no caso de feitos delictivos de racismo, xenofobia, violencia de xénero, homofobia ou outros delitos contra os Dereitos Humanos ou os dereitos das persoas traballadoras.